

LA TARASCA



Association pour l'Enseignement de la Langue d'Oc

Mai de 2022

A l'espèra

Oc

En reacion a la dinamica creada pèr lo debat de la lèi Molac, la promiera responsa de l'eisecutiù siguèt de crear doas istancis nacionalas. Jan-Michèu Blanquer fasié pas d'alòngui pèr crear la promiera au sieu en negant lei lengas regionalas dins un Consèu superior dei lengas istalat lo 24 de Janvier emé lei lengas estrangieras e lei lengas mòrtas. Jan Castex, coma v'avié promés, vèn d'istalar lo 31 de març lo Consèu Nacionau dei lengas regionalas, sènsa que siegue pèr ara definit pèr ges de tèste òuficiau. Si rapelarem qu'es estat creat pèr lo promier còup en 1985, puei entarrat òuficialament en 2006, puei ressucitat en 2013, puei mai entarrat de carapachons, e que renaisse vuei just quand lo Premier Ministre fa sei quatre nos.

Lo Forum d'Oc a banejat mai a Tolon lo 5 de Febrier après dos ans d'estrechiment a causa de l'epidemié. Siguèt l'òucasien d'entendre Pau Molac faire lo ponch sus lei promiers mes de sa lèi, e pèr Michèu Feltin-Palas de l'Express de presentar son questionari ais elegits en 25 questiens de respondre pèr òc o pèr non, que lo Forum a mandat en totei lei candidats a la presidènci, e que si prepara a esparidir pròchi lei candidats a la deputacien. Degun a aujat de relevar lo desfis de l'engajament concret, e soleta Natalia Arthaud faguèt una responsa favorabla, mai globala. La coordinacien nacionala Pèr que viscon nòstrei len-

gas, que l'AELOC n'es membre, faguèt mai flòri emé quauquei questiens pus generalas. Lei responsas s'es-calonèron sènsa suspresa dei mai entosiastas, coma de Yannick Jadot, Felipe Poutou, e Fabian Roussel, ai pus restrictivas coma aquela de Jan-Luc Melenchon, pèr rèn dire de Marina Le Pen que cocha l'ensenhament de la lenga fòra deis oras de classa...

Lo Consèu academique de la lenga regionala s'es tengut as Ais lo 21 de Febrier en renosant mé lei reünions en presenciau. Nen trovaretz lo rendut-còmpte precis e fòrça istrutiù, establìt pèr nòstra vici-presidènta Natalia Wurbel, sus lo site de l'AELOC, emé leis estatisticas de l'Academié. Coma l'an passat, una tieria de sièis questiens fundamentalas, establidas d'un comun acòrd pèr lei sindicats e leis associaciens de promocien de la lenga d'òc (franc dau Felibrige que si n'es retirat aquest an) siguèt presentada au Reitor e debatuda emé de promessas de responsas. Leis estatisticas marcon una situacien estacionari, levat d'una pèrda d'una centena de colegians, mai la compareson entre lei chifras globalas de 2012 e d'aquest an revèlon una pèrda de mai de mila escolans. La convencien entre leis Academiés de Niça e das Ais emé la Regien serié en preparacien.

L'espèra deis escasènças eleitoralas a palaficat encar mai que d'abituda l'evolucien dau destin politic dei lengas de França. Es evident que la situacien de l'ensenhament es au miés estadissa e au piège degalhada après la desastrosa politica de Jan-Michèu Blanquer. Lo movament associatiu e sei partenaris auran de s'acarar a la situacien que resultarà dau novèu paï-sagi.

Alan Barthélemy-Vigouroux

*Bulletin intérieur distribué gratuitement aux adhérents
parution trois fois par an. Imprimé avec l'aide du
CONSEIL DEPARTEMENTAL 13
et du CONSEIL REGIONAL SUD-PACA
L'AELOC est affiliée à la FELCO et aux AIL
contacts : oebmestre@aeloc.fr
web : <http://www.aeloc.fr>*